

Poslanička pitanja

sa XXIX sjednice Skupštine Unsko-sanskog kantona

27.11.2012.godine

Bihać

Predsjedavajući Skupštine Unsko – sanskog kantona, Admir Hadžipašić:

Gospođa Elvira Abdić Jelenović, poslaničko pitanje.

Poslanica Elvira Abdić Jelenović:

Za danas imam dva izaslanička pitanja.

Moje prvo pitanje upućujem Ministarstvu unutarnjih poslova Unsko – sanskog kantona.

Prije više od mjesec dana jedan broj članova predsjedništva Demokratske Narodne Zajednice u svoje ime su uputili notu zabrinutosti za sigurnosnu situaciju u Velikoj Kladuši i šire, među ostalima i MUP-u Unsko – sanskog kantona. Povod za to pismo je pismeni zahtjev 2.330 članova DNZ-a za neopozivu ostavku svih organa stranke i za hitno zakazivanje sjednice skupštine općinskog ogranka, kako bi otpočeo proces unutar stranačkih izbora. Obzirom da se u navedenom tekstu navodi moje ime u ulozi glavnog krivca za tu situaciju, stavljam mi na teret dijela za koja držim da organi gonjenja trebaju provesti istragu, postavljam nekoliko pitanja:

- Da li je MUP Unsko – sanskog kantona provodio istragu vezano za paušalne ocjene o stanju sigurnosti na općini Velika Kladuša i šire?
- Na koji način i kojim metodama služba MUP-a može ocijeniti zabrinutost i strah kod građana, obzirom da se radi o duševnom stanju?
- Da li je u vrijeme predizborne kampanje na području Velike Kladuše i šire zabilježen slučaj remećenja javnog reda i mira i ukoliko jeste, da li se u kojem od tih slučajeva nalazim kao počinitelj?

Ujedno ministru upućujem i požurnicu na jedno pitanje koje sam poslala na ranijim sjednicama i ono je u prilogu ovog pitanja.

Moje drugo pitanje upućujem Agenciji za privatizaciju Unsko – sanskog kantona.

Na posljednjoj izvanrednoj sjednici Doma Naroda na dnevnom redu se našla Odluka o imenovanju članova direkcije za pasivni podbilans poduzeća i banaka. Ista nije izglasana, ali me podsjetila na odgovor direktora Agencije za privatizaciju u Unsko – sanskom kantonu u prošlom sazivu, da su poduzeća dužna dostaviti popis obaveza, potraživanja i imovine, što ona ne čine. Također, usvojen je i Nacrt Zakona o konsolidaciji gospodarskih društava, koji pretpostavljam treba zaživjeti na pasivnom podbilansu, pa u cilju što kvalitetnije pripreme za predstojeću javnu raspravu postavljam nekoliko pitanja:

- Koja poduzeća iz Unsko – sanskog kantona imaju evidentirana prava, potraživanja i imovinu u pasivnom podbilansu?
- Kakva je uloga Agencije za privatizaciju u Unsko – sanskom kantonu?
- U kojim poduzećima na Unsko – sanskom kantonu država ima djelomično učešće u kapitalu i kolike su obaveze tih poduzeća prema Fondu PIO – MIO i prema Poreznoj Upravi?
- Da li je imovina tih poduzeća predmet sudskih izvršenja?

Molim pismeni odgovor.

Zahvaljujem.

Predsjedavajući Skupštine Unsko – sanskog kantona, Admir Hadžipašić:

Zahvaljujem se. Gospodin Damir Hodžić, poslaničko pitanje.

Poslanik Damir Hodžić:

Poštovani Predsjedavajući, kolegice i kolege zastupnici, ministri u Vladi Unsko – sanskog kantona, predstavnici kantonalnih institucija, predstavnici boračkih udruženja, mediji. Sve vas skupa selamim i pozdravljam.

Ja imam za danas jedno pitanje koje postavljam Vladi Unsko – sanskog kantona i Premijeru Vlade.
A povodom medijskih saopštenja samostalnog sindikata Željeznica Federacije Bosne i Hercegovine.

- Da li će Unsko – sanski kanton ostati bez posljednje željezničke linije na Unsko – sanskom kantonu, linije Bihać – Bosanska Krupa?

Naime, u saopštenju samostalnog sindikata Željeznica navodi se kako zbog nespremnosti Vlade Unsko – sanskog kantona da pomogne i sufinansira troškove linije, dolazi do ukidanja ove željezničke veze, a samim time i do potpune izolacije Unsko – sanskog kantona kada je u pitanju željeznički saobraćaj. Nakon što smo ostali nedavno bez brze linije Sarajevo, takozvane brze linije Sarajevo – Bihać, evo ostajemo vjerovatno i bez ove linije između Bihaća i Bosanske Krupe. Mi smo se ovdje naslušali priča o aerodromima, o avionima i helikopterima, a očito je da nismo u stanju zadržati ni najprimitivniji način prevoza putnika. A ako znamo da je željeznička infrastruktura osnov privrednog razvoja bilo koje regije, onda je jasno kakva je politika trenutne Vlade Unsko – sanskog kantona kada je u pitanju razvoj ovoga dijela Bosne i Hercegovine.

Ja vam se zahvaljujem.

Predsjedavajući Skupštine Unsko – sanskog kantona, Admir Hadžipašić:

Zahvaljujem se gospodinu Hodžiću. Gospođa Mira Ljubijankić, poslaničko pitanje.

Poslanica Mira Ljubijankić:

Poštovani prisutni u ovoj dvorani, sve vas toplo pozdravljam. I one slušaoce koji nas ovog momenta slušaju na Radiu Unsko – sanskom.

Moje pitanje je upućeno Vladi i našem Univerzitetu.

- Koliko stanova u vlasništvu ima Vlada zajedno sa njenim ustanovama svim i koliko stanova ima u vlasništvu Univerzitet u Bihaću i ko je korisnik tih stanova?

Molim vas imenom i prezimenom.

Hvala.

Predsjedavajući Skupštine Unsko – sanskog kantona, Admir Hadžipašić:

Zahvaljujem se. Gospodin Ismet Dolić, poslaničko pitanje.

Poslanik Ismet Dolić:

Gospodo Predsjedništvo, kolegice i kolege zastupnici, članovi Vlade, dragi gosti, slušatelji i gledatelji Kantonalne Radio – televizije, dobar dan i lijep pozdrav.

Ja imam jedno zastupničko pitanje. Ono je adresirano na gospođu ministricu finansija.

A ono se odnosi na već poznatu činjenicu vezano za onih famoznih pet i pol milijuna maraka koje šest godina stoje na računu Unikredit Zagrebačke banke.

- Mene ovdje interesira pod kojim uvjetima su znači ta sredstva tamo stavljena da stoje, miruju već šest godina i na taj način je osigurano siguran prihod Unikredit Zagrebačkoj banci, minimum dva milijuna maraka, a proračun Unsko – sanskog kantona je sigurno po prosječnim kamatnim stopama koje vrijede na tržištu izgubio milijun maraka?

Znači milijun maraka. Netko je za ovo odgovoran. A to je jednostavno jedno stanje i situacija kao kada se doživi brodolom, pa svi se topimo, a neko je zaključao pojaseve za spašavanje. Znači i ovdje se radilo o slučaju da pet i pol milijuna maraka stoje negdje na računu, a nama su itekako potrebna. Vidjećemo sada poslije ovih točaka dnevnog reda što će se desiti sa proračunom pa ćemo vidjeti što bi to značilo. Mene ovdje interesira i želim zamoliti gospođu ministricu, možda se ona već upoznala sa time, ako može nešto reći usmeno vezano za to tko je to potpisao taj ugovor? Volio bih da se dostavi, da se taj ugovor dostavi na uvid javnosti. Volio bih takođe da se vidi znači ko je to odgovoran, da li je neko namjerno to omogućio Unikredit banci da ima svoj kreditni potencijal za pet i pol

milijuna nesmetano veći nego što treba, a s druge strane ošteti proračun Unsko – sanskog kantona. Molim Vas gospođu ministricu, dostavite nam svu dokumentaciju vezano za to da nam bude jasno i eventualno ako bude elemenata kaznenog dijela da se ta dokumentacija proslijedi nadležnom organu.

Hvala lijepo.

Predsjedavajući Skupštine Unsko – sanskog kantona, Admir Hadžipašić:

Zahvaljujem se gospodinu Doliću. Gospodin Mirvet Beganović, poslaničko pitanje.

Poslanik Mirvet Beganović:

Poštovane dame i gospodo, Predsjedavajući, potpredsjednici, Sekretaru, ministri iz Vlade, gosti, kolegice i kolege, koristim priliku da vas pozdravim.

Imam dva poslanička pitanja.

Moje prvo pitanje je Predsjedavajućem Skupštine i Kolegiju.

- Kada će doći izvještaj Vlade na sjednicu ove Skupštine?

Evo prolaze već dvije godine, imamo još mjesec dana. Zakonska obaveza u skladu sa poslovníkom je da taj izvještaj se dostavi. Izvještaj je dostavljen, stoji u Skupštinskim klupama. Ko je taj ko ga blokira? Samo iz jednog razloga, mi danas imamo rebalans budžeta, imamo zakone, imamo mnoge stvari i ukoliko bi da smo imali na razmatranju taj izvještaj Vlade, vjerovatno bi lakše mogli onda, imali i jasniju situaciju oko rebalansa i svega i puno bi lakše prolazili određeni predmeti.

Moje drugo pitanje ide načelniku općine Cazin i Premijeru Unsko – sanskog kantona.

Ovih dana smo svjedoci da evo Dan državnosti je protekao. Svi su javno izrekli da podržavaju i da njeguju tradiciju antifašizma. Moje pitanje je Premijeru sad kao novoj platformi, novoj većini:

- Da li će općina Cazin vratiti spomen obilježje na Trgu Alije Izetbegovića?

Jer to je mjesto gdje su se okupili, gdje je prvi put, jedan od elemenata da su udareni temelji Bosne i Hercegovine. Zbog toga postavljám pitanje šta će biti poduzeto i da li će taj spomenik biti vraćen na mjesto gdje je i bio? Može se bez ikakvih onih, evo trg je stvarno lijepo uređen i stvarno ima svoje vrijednosti, bez ikakvih problema može se vratiti na mjesto gdje je bio. Ne zauzima puno prostora, a obilježava jedan prostor. Ja kažem to je od 41' do 45' ne ulazeći poslije, jedan prostor kojim njegujemo tradiciju antifašizma i priznajemo da su temelji Bosne i Hercegovine udareni u Mrkonjić Gradu na prvom zasjedanju AVNOBIH-a.

Hvala vam lijepa.

Predsjedavajući Skupštine Unsko – saskog kantona, Admir Hadžipašić:

Zahvaljujem se. Gospodin Husein Rošić, poslaničko pitanje.

Poslanik Husein Rošić:

Uvažene kolegice i kolege, ja ću u skladu sa Poslovníkom o radu Skupštine postaviti dva poslanička pitanja. I naravno, u skladu sa članom 191 stav 6 izraziti nezadovoljstvo sa odgovorom, odnosno neodgovorom koji evo nisam dobio u proteklih šest mjeseci.

Ja ću svoje prvo poslaničko pitanje postaviti Resornom Ministarstvu privrede i Ministarstvu finansija.

A nadovezaću se na poslaničko pitanje uvaženog kolege, gospodina Dolića. A tiče se sredstava ostvarenih od postupka privatizacije koja su od ove godina naravno i operativna. Naime zakonom o izmjenama i dopunama Zakona o privatizaciji preduzeća, Službene Novine Federacije 4/09, izmjenom člana 33 stav 2 je kazano da novčana sredstva ostvarena prodajom preduzeća iz nadležnosti Agencije za privatizaciju i kantonalnih agencija sa izuzetkom dijela sredstava namijenjenih za finansiranja Agencije Federacije i kantonalnih agencija na koja su saglasnost dala nadležne vlade, prebacuju se na poseban fond Razvojne banke Federacije Bosne i Hercegovine. Pitanje glasi:

- Da li je Vlada Unsko – saskog kantona donijela odluku kojom će se sredstva sa ESKROV računa usmjeriti na račun Fonda Razvojne banke Federacije Bosne i Hercegovine?

Odgovor tražim u pisanoj formi.

Moje drugo poslaničko pitanje ću postaviti Resornom Ministarstvu za pitanje boraca i ratnih vojnih invalida.

Naime, mi kada smo usvajali budžet Unsko – saskog kantona za 2012 godinu, tada smo od resornog ministarstva dobili od prilike pregled obaveza iz prethodne godine. Pa tako, na godinu budžetsku mislim 2011-tu, obaveze su iznosile cirka 812.474 konvertibilne marke po na osnovu različitih potraživanja. Tu prije svega mislim na sve one obaveze prema Zakonu o dopunskim pravima boraca. A u prva tri mjeseca u 2012 godini te obaveze su iznosile negdje oko 217.835.

- Koliko ovih obaveza je izmireno i kolika obaveza je prenešena u 2012 godinu, s obzirom da mi u izmjenama i dopunama budžeta imamo umanjeње ovih stavki cirka blizu oko milion konvertibilnih maraka?

I naravno, u skladu sa Poslovníkom gospodine Predsjedavajući, član 191 stav 6. Ja sam na jednoj od proteklih sjednica Skupštine Unsko – saskog kantona postavio poslaničko pitanje Resornom Ministarstvu obrazovanja, nauke, kulture i sporta, kao i Rektoratu, odnosno rektoru na ruke. A tiče se špekulacija koje evo već duže vrijeme imamo u javnosti. Vezane su za takozvanu obmanu gospodina Lipovače, Akademsku zajednicu i da je on uz pomoć čelnih ljudi koji su u to vrijeme bili na Univerzitetu u Bihaću, ekvivalenciju svoje diplome i osnovnog studija na pravnom fakultetu nostrificirao kao diplomu post diplomskog studija. Ja ću ponoviti to poslaničko pitanje i tražim da mi se što prije da odgovor. Dakle:

- Kada i gdje je gospodin Lipovača završio pravni fakultet?
- Kada i gdje je upisao post diplomski studij?
- Koliko semestara je trajao post diplomski studij?
- Koje predmete je slušao i koji prosjek ocjena je postigao na post diplomskom studiju?
- Kada i gdje je završio post diplomski studij?
- Pred kojom komisijom i na koju temu je odbranio magistarski rad iz oblast pravnih nauka?
- Koju titulu je stekao završetkom post diplomskih studija?

Naime, ja sam dobio informaciju da je rektoru prijećeno porukom da razmisli dobro o svojoj porodici kada bude slao odgovor.

Hvala lijepo.

Predsjedavajući Skupštine Unsko – sanskog kantona, Admir Hadžipašić:

Zahvaljujem se. Gospodin Sead Kadić, poslaničko pitanje.

Poslanik Sead Kadić:

Evo ja sam odlučio da ne postavljam više teška pitanja, jer obično na njih ne dobijam odgovore. Ja ću probati sad da postavljam malo lakša pitanja, ona koja malo život znače ovim našim građanima i odaje jednu opštu sliku o ovom kantonu. Znači definitivno ovdje se ne isplati postavljati teška pitanja, na njih nema odgovora. I sumnjam da će te Vi gospodine Rošiću dobiti odgovor na ova Vaša pitanja, jer ona su ovako prilično poteška.

Prvo moje pitanje se odnosi na oznaku ili bilbord na kome se nalazi dobrodošlica ulaska na Unsko – sanski kanton, a isti se nalazi na magistralnom putu Bosanski Petrovac – Bihać i to na izlasku iz Ripačkog klanca prema Ripču.

Naime, već desetak mjeseci ovaj bilbord stoji polusrušen, što daje jednu ružnu sliku o nemoći i o općem stanju na kantonu. Postavljam pitanje:

- Čija je ovo nadležnost i kako mi to mislimo privlačiti turiste i investitore, a osnovne stvari kao što je ovo ne možemo držati uredu?

Tražim pisani odgovor ili odgovor ovdje usmeni od nekoga ko mi to može pružiti. A svi ste svjedoci da je ovo tačno što ja ovdje govorim.

Drugo pitanje je pitanje direktora Pedagoškog Zavoda, gospodina Ismeta Bećiragića i njegovog brutalnog istjeravanja sa mjesta direktora Pedagoškog Zavoda, pod krinkom da je stekao uslove za penzionisanje, što negira dokumenat koji predajem Predsjedavajućem Skupštine, a izdat je od strane Penzijsko – invalidskog osiguranja Mostar.

Hvala lijepa.

Predsjedavajući Skupštine Unsko – sanskog kantona, Admir Hadžipašić:

Zahvaljujem se gospodinu Kadiću. Gospodin Nijaz Hušić, poslaničko pitanje.

Poslanik Nijaz Hušić:

Gospodine Predsjedavajući, zamjenici, uvažene kolegice i kolege, ministri u Vladi kantona i svi prisutni.

Ja ću naravno isto kao i moje kolege malo prije izraziti jedno negodovanje. I zamolio bih Predsjedavajućeg kao vrhovnog autoriteta u ovoj Skupštini, ako ga uopšte još i ima, da obezbjedi nama poslanicima odgovore na ova poslanička pitanja. Ili je i ta praksa sa tim odgovorima prestala. Jer mi evo na ovoj sjednici nismo dobili, bar ja nisam dobio odgovor niti na jedno poslaničko pitanje. S toga moram zaista izraziti nezadovoljstvo, jer na jednoj od prošlih sjednica sam postavio pitanje resornom ministru, dakle ministru za pitanje boraca, da mi se dostavi određena dokumentacija i informacije. Naravno da ih još uvijek nisam dobio. A dokaz da sam upravu bio kad sam to govorio je i činjenica da se evo u proteklim danima praznika policija sprovodi istragu na terenu i ljudi se saslušavaju po pitanju dakle primitka novca iz ovog ministarstva za lokalne izbore. Dakle i samo ovo ne odgovaranje je meni jasan odgovor da sam vjerovatno bio po ovom pitanju upravu.

Svoje pitanje želim danas postaviti ministru obrazovanja, nauke, kulture i sporta.

Možda je to više, da ne kažem inicijativa, nego jedno pitanje. A zamolio bih zaista da ovo ministarstvo napravi jednu sveobuhvatnu analizu, analizu započetih školskih objekata na prostoru Unsko – sanskog kantona, dakle objekata koji se da tako kažem služe u svrhu obrazovanja naše djece. Imamo zaista jedan veliki broj takvih objekata koji su započeti, koji godinama stoje. Imamo školu u Majetićima, imamo školu u Platnici, imamo školu u Ljubijankićima, imamo sportske dvorane, imamo zasigurno i u drugim općinama jedan veliki broj školskih objekata koji nam sad nakon nekoliko godina stoje nezavršeni i sigurno zub vremena će učiniti svoje i ti objekti će trajno otići u nepovrat i te investicije koje smo do sad uložili u sve to.

- Tražim dakle da se dostavi kompletna jedna informacija vezano za sve započete školske objekte, da se za svaki pojedinačni objekat dostavi informacija u kojoj je taj objekat fazi i kolika je vrijednost do sad uložених sredstava u taj objekat i kolika je procjena ministarstva koliko bi to trebalo da se ti dotični objekti završe.

Jer nama evo ide nova budžetska godina, kako bi možda u ovoj budžetskoj godini obezbjedili sredstva za te projekte. Mi ćemo evo danas vjerovatno, ako Bog da, donijeti odluku o proglašenju javnog interesa i Katoličkog Školskog Centra. Smatram da i ove područne škole u kojima možda u nekim od njih ide i veći broj učenika nego u ovaj centar, djeca idu zaista u neuslovnim prostorijama. Molio bih jednu ovakvu informaciju da se mi kao poslanici možemo prilikom donošenja budžeta za narednu godinu, odrediti i na neki način možda obezbjediti određena sredstva za sve ove školske objekte.

Zahvaljujem.

Predsjedavajući Skupštine Unsko – sanskog kantona, Admir Hadžipašić:

Zahvaljujem se. Gospodin Esad Bašević, poslaničko pitanje.

Poslanik Esad Bašević:

Obzirom da se prvi put javljam, koristim priliku da selamim sve prisutne, posebno predstavnike boračkih udruženja i sindikata, koji su danas ovdje s nama.

I moje poslaničko pitanje upućujem Vladi, konkretnije Ministarstvu finansija, s obzirom da nema Premijera. A odnosi se na revizorski izvještaj.

- Naime, kada će ova Skupština, kada će poslanici dobiti izvještaj Federalnog revizora o poslovanju Vlade za protekli period?

Svjedoci smo da u medijima Premijer odgovara na te navode. Međutim, mi ovdje nemamo taj izvještaj. Bilo bi uputno i u svim normalnim demokratskim sistemima revizorski izvještaji dođu na vrijeme parlamentima, odnosno skupštinama i ne vidim nikakvog razloga da i mi ne dobijemo taj izvještaj, da vidimo kakvo je to stanje. Ovo tim prije što danas imamo evo rebalans budžeta i nemamo navode revizora da vidimo kakvo je to bilo poslovanje, da danas poredimo, odnosno otklonimo sve one nedostatke koje možemo samo iz medija na žalost da primimo kao informaciju. S toga još jednom molim ministricu koja je danas ovdje, obzirom da se radi o reviziji finansijskog poslovanja, odnosno izvršenju budžeta za 2011, da nam do naredne sjednice dostavi ovaj izvještaj. Ukoliko ne dostavi, mi iz Kluba SDA tražićemo druge načine da dođemo do tog izvještaja.

Hvala.

Predsjedavajući Skupštine Unsko – sanskog kantona, Admir Hadžipašić:

Zahvaljujem se. Gospodin Farko Hodžić, poslaničko pitanje.

Poslanik Farko Hodžić:

Evo poštovani, još jednom vas pozdravljam.

Ja upućujem jedno poslaničko pitanje. Ono se odnosi na Federalnu Direkciju cesta, Kantonalnu Direkciju Cesta i donekle MUP jer je on odgovoran ipak za saobraćaj.

Naime, ja sam na prijašnjim Skupštinama postavljao pitanje oko vertikalne i horizontalne signalizacije na našim saobraćajnicama. Nešto se tu poduzelo i došlo je do poboljšanja te signalizacije. Međutim, u zadnje vrijeme nekako nestaju ti saobraćajni znaci. Gdje se god stavi radar, odjednom nestane saobraćajni znak za ograničenje brzine. Evo primjera radi u Pokoju, gdje kada ulazite u grad sa desne strane je stajao saobraćajni znak ograničenja 50 kilometara na sat. Sad tog znaka nema. S druge strane, govorio sam ovdje i tražio da se stave upozoravajući znaci za radarsku kontrolu. Negdje ima, ali dosta ih nema. Dobri su ovi radari, oni koliko toliko utiču na brzinu saobraćaja na našim putevima.

Međutim, to nije umanjilo broj udesa, a posebno sa teškim posljedicama. S druge strane, na mnogim našim putevima magistralnim, a posebno i Federalne Direkcije za ceste, označene su sa onim sprejevima i tako dalje, za određenu konstrukciju. Evo ulazimo u zimu, padaće temperatura za koji dan ispod minusa, ti poslovi nisu obavljani.

- Kad će se to obaviti, hoće li se opet prenijeti u iduću godinu?

Posebno za magistralni put koji prolazi kroz grad Bihać, gdje je od autobusne stanice pa preko mosta Alije Izetbegovića i tako dalje, imamo ogromne rupe već 4 – 5 godina. I umjesto da se kroz grad prvo uradi, oni se rade na magistralnom putu M – 5, a tek hoće li završiti grad ili neće, to je veliko pitanje. I onda su ljudi prisiljeni da betoniraju rupe, što je totalno u suprotnosti sa Zakonom o saobraćaju. I tražim, kad će se to preuzeti i da imamo koliko toliko sigurne saobraćajnice.

Hvala lijepa.

Predsjedavajući Skupštine Unsko – sanskog kantona, Admir Hadžipašić:

Zahvaljujem se gospodinu Hodžiću. Gospodin Asim Kamber, poslaničko pitanje.

Poslanik Asim Kamber:

Ja sam veoma ozbiljno shvatio Premijerovu izjavu na prošloj sjednici za govornicom, da moraju se na pitanja slati odgovori. I zaista ja tom čovjeku nemam razloga da vjerujem. I ja bih zamolio predstavnike Vlade i onih institucija kojima se postavljaju pitanja da odgovaraju na ta pitanja. Ja nisam dobio na četiri pitanja do sada odgovor.

Ja sam htio postaviti pitanje vezano za rebalans budžeta koji je danas na dnevnom redu. Naime, ministar u Vladi Federacije iz Sanskog Mosta je dio tima pregovaračkog sa međunarodnim monetarnim fondom. I u paketu sredstava ove slijedeće tranše, koja će biti dogovorena petog, decidno je dakle kazano da ta sredstva neće ići kantonima. S obzirom da u današnjem rebalansu imamo sredstva međunarodnog monetarnog fonda iz tranše koja neće ići kantonima, predviđena za pokrivanje obaveza prema budžetskim korisnicima, mislim da se Premijer vješto toga dosjetio i stavio nešto za što neće biti odgovoran. On će onda reći da nije dobio sredstva međunarodnog monetarnog fonda i neće se pokriti one obaveze iz deficita predviđenog, odnosno pogotovo prema budžetskim korisnicima i nekim drugima. Ja se sjećam i Premijerove izjave kada je obećao radnicima Agrokomerca u štrajku 5 miliona, kada je bio kandidat za Premijera. Ja sam i tada rekao bilo bi to onako i simpatično kad neko tako nešto govori kao načelnik. Međutim, ovdje zaista nikom nije do simpatija da se laže 5 hiljada ljudi.

(PREKINUTO IZLAGANJE)

Predsjedavajući Skupštine Unsko – sanskog kantona, Admir Hadžipašić:

Gospodine kambere, poslaničko pitanje.

Poslanik Asim Kamber:

I ja u tom smislu želim postaviti pitanje, ministru finansija Vlade Federacije BiH, Anti Krajini:

- U rebalansu budžeta za 2012 godinu predviđeno je plaćanje obaveza prema budžetskim korisnicima iz granta MMF-a. Molim Vas da mi odgovorite na pitanje da li će iz naredne tranše sredstava MMF-a koja se očekuje u dvanaestom mjesecu, biti dodijeljen dio sredstava i kantonima?

Drugo pitanje upućujem Premijeru Vlade USK-a, Hamdiji Lipovači i Kantonalnom Fondu za pitanje boraca.

Naime, zgrada boračka u Bihaću, evo godinama se gradi. Informacija nezvanična od predstavnika tamo koji su potpisali ugovor, je da ta zgrada košta četiri puta više nego što košta metar građevinskog prostora u Sanskom Mostu. I možda je upravo to jedan od razloga. Međutim, činjenica da u istom kantonu gdje je ista cijena građevinskog materijala, iste cijene radova, da nešto košta i više puta u odnosu na susjednu općinu, mene malo zabrinjava. Zato postavljam pitanje Kantonalnom Fondu za zbrinjavanje boraca i Premijeru:

- Već duži period traje projekat izgradnje zgrade za smještaj zaslužene populacije u Bihaću. Molim vas da mi odgovorite kolika je cijena do sada izvedenih radova po metru kvadratnom i kolika će biti konačna cijena izvedenih radova? To bi valjda moglo biti projicirano ugovorom. I molim vas da mi dostavite sve situacije izvedenih radova.

Hvala lijepo. U pisanoj formi predajem.

Predsjedavajući Skupštine Unsko – sanskog kantona, Admir Hadžipašić:

Zahvaljujem se gospodinu Kamberu. Nema više prijavljenih. Zaključujem ovu tačku dnevnog reda. Ako ima potrebu neko ispred ministarstava od ministara da da odgovor? Gospodin Šefik Smlatić, ministar ministarstva za unutrašnje poslove.

Odgovori na poslanička pitanja

Ministar unutrašnjih poslova Unsko – sanskog kantona, gospodin Šefik Smlatić:

Poštovani Predsjedavajući, zamjenici, poslanici, mediji.

Evo, ovako kratko. Ja ću poštovanoj poslatici Elviri Abdić odmah dati odgovor. Dopis koji je stigao između ostalog pored Ministarstva unutrašnjih poslova, isti je upućen na Ministarstvo unutrašnjih poslova Federacije BiH, zatim OHR Sarajevo, Ambasada Sjedinjenih Američkih Država, Ambasada Republike Turske, Ambasada Republike Hrvatske. Ovaj dopis je upućen i potpisan od strane gospodina Rifeta Dolića, predsjednika Demokratske Narodne Zajednice BiH, u kojem se između ostalog navodi ono što ste Vi rekli. Želim samo da Vam kažem da sam u skladu sa svojim ovlaštenjima

isti dopis, iako meni potpuno nerazumljiv, prosljedio Upravi policije na njihovo zakonito postupanje i u njihovu nadležnost. I oni po tom pitanju poduzimaju ono što je u njihovim okvirima nadležnosti. Drugo, što se tiče Vašeg pitanja vezano za, a ono se na neki način dotiče svega ovoga, želim da Vam kažem, a to je bilo na jednoj od Skupština, da je nakon provedene izborne kampanje na Unsko – sanskom kantonu rezultati po pitanju remećenja javnog reda i mira ili pojave da dolazi do većih kršenja nije bilo ni po tom pitanju, a pogotovo Vas nigdje nema, niti je bilo ko Vas spominjao, barem ono što sam ja imao priliku da vidim. Što se tiče ovog pitanja od uvaženog poslanika, gospodina Faruka Hodžića, želim da kažem još jednom. Kada je u pitanju vertikalna signalizacija na putevima lokalnim i regionalnim, oni su u nadležnosti Kantonalne Direkcije za ceste. Kad je u pitanju lokalni nivo, općina, onda se ide preko općinskog vijeća, postoji komisija koja u skladu sa potrebama treba da poduzme i da predloži. Ministarstvo može samo da eventualno provede istragu ko je ukrao znak. Ali ministarstvo nema veze sa znakom. Jer znate, Vi ste sad ovdje rekli jednu vrlo čudnu konstrukciju. Ispred radara je nestao znak ograničenja za 50. Pa onda će još ispasti da ga je policija smakla da bi Farko napravio prekršaj, vozio preko 50. Zato Vas molim. Mi uistinu s tim nemamo ništa, ali mi ćemo se potruditi da vidimo gdje je taj znak koji je nestao. Što se tiče Federalne Direkcije, isti je nivo. Znači kad imamo ceste magistralne iz nadležnosti Federalne Direkcije, oni su nadležni da postavljaju vertikalnu i horizontalnu signalizaciju.

Hvala, prijatno.

Predsjedavajući Skupštine Unsko – sanskog kantona, Admir Hadžipašić:

Zahvaljujem se. Gospodin Mirsad Topčagić, ministar za boračka pitanja.

Ministar za boračka pitanja Unsko – sanskog kantona, gospodin Mirsad Topčagić:

Gospodine Predsjedavajući, zamjenici, gospodo zastupnici i gospođe zastupnice, ministri u Vladi, mediji, gosti, ja vas sve skupa selamim i pozdravljam.

Pa ja bih zaista želio samo podsjetiti gospodina Hušića da je na pred prošloj sjednici Skupštine postavio nekoliko pitanja ovom ministarstvu na koja su mu uredno odgovorena. Na prošloj sjednici je istakao nezadovoljstvo sa određenim dijelom odgovora. Ja moram konstatirati da sa današnjim danom, bar ne znam ako nije jutros stiglo, to pitanje u onom dijelu u kojem ni Vi niste zadovoljni, nije dostavljeno ministarstvu. Čim bude dostavljeno, nema razloga da Vama ne bude odgovoreno.

Zahvaljujem.

Predsjedavajući Skupštine Unsko – sanskog kantona, Admir Hadžipašić:

Zahvaljujem se. Odgovore na poslanička pitanja ima ministrica ministarstva finansija, gospođa Azemina Helić.

Ministrica finansija Unsko – sanskog kantona, gospođa Azemina Helić:

Gospodine predsjedavajući sa saradnicima, kolege ministri, cijenjeni poslanici, dragi gosti.

Obzirom da je gospodin Dolić postavio vijećničko pitanje, ja smatram da je najsigurnije i najbolje da on na ovo vijećničko pitanje dobije u pisanoj formi. Jer se ovdje radi o brojevima, o datumima sklopljenog ugovora, na koje ja ovaj momenat ne mogu sigurno reći.

Hvala lijepo.

Predsjedavajući Skupštine Unsko – sanskog kantona, Admir Hadžipašić:

Zahvaljujem se. Nema više potrebe za odgovorima. Gospodin Farko Hodžić traži po Poslovniku. Kaže da je nezadovoljan odgovorom.

Poslanik Farko Hodžić:

Evo samo kratko. Ja nisam kazao, ja dobro znam ko je odgovoran za vertikalnu i horizontalnu signalizaciju na našim putevima. Znači, to mi je potpuno jasno. Kažem da MUP i kazao sam da MUP učestvuje u regulisanju saobraćaju, da je nadležan za to. Činjenica je da je taj znak nestao. Vi će te postupiti ako ste dobili prijavu da je on nestao. Sumnjam da ste dobili prijavu da je on nestao. Ali hoću da kažem da su nestali znaci. Je li neko njega udario pa je on izbijen, je li na ovakav način, ali jednostavno nema znaka. I zato sam reagovao, čisto da se zna da je bio znak, a sad ga nema.

Predsjedavajući Skupštine Unsko – sanskog kantona, Admir Hadžipašić:

Zahvaljujem se.